

Anuesca Baly Directora di SKOA:

SKOA ta pone su granito di arena pa mehora enseñanza na su scolnan y en general



ORANJESTAD (AAN)— Den entrevista cu directora di SKOA, Anuesca Baly, el a wordo puntra si ta asina cu diferente fundacion y instancianan cu ta enfoca riba otro profesion, ta mostrando SKOA su deseo pa nan hiba nan conocimiento na scolnan, y kico e ta pensa tocante esaki.

Sra. Baly a splica cu SKOA ta habri pa duna e parti aki di enseñanza, y nan ta trece den e curriculum. E cabezantenan di cada scol ta scoge kico pa nan ta relevante, pasobra cada scol den cada bario tin nan propio retonan y duna tur un chens ta un di e metanan di SKOA.

Un di e temanan ta, por ehemplo, Educacion Sexual. Un tema cu, den pasado, SKOA a bin cune den su scolnan y a caba cu e proyecto aki na December aña pasa.

SKOA ta tuma un pause pa sondea y wak si locual a wordo duna den e cinco añanan cu tabata tin e tema Educacion Sexual na e scolnan, a resulta enberdad.

E tema aki ta den planning pa reinicia aki un aña y mey, pasobra SKOA a ripara cu el a duna resultado exitoso. Esey no ta kita cu e ta importante pa ripitie, pasobra ora SKOA ta bin cu algo innovativo e kier pa keda. Mundo ta cambia,

e muchanan ta cambia, pero e mesun temanan ta keda.

Por ta nan ta drenta den otro manera, pero nan ta keda problematico y tin cu sigui haya atencion di scol pasobra si no tuma atencion y no dune atencion, e lo por bira un problema hopi grave.

Sra. Baly a expresa cu sigur SKOA kier pone su granito di arena pa por mehora su enseñanza no di SKOA so, pero di Aruba en general.

SKOA ta inverti tambe den duna informacion na mayornan. Hopi scol ta hacie parti atardi y otronan ta hacie anochi. Ainda nan no ta logrando pa 100% di e mayornan asisti, pero esey no ta stop e fundacion pa keda inverti. E ta bay poco poco, pero bayendo asina e ta crece.

Sra. Baly a expresa cu e tin pasenshi y e ta kere cu mayornan tambe ta involucra den e desaroyo di nan yiunan.

E ta kere tambe cu tur instancia mester traha hunto y conhuntamente duna e mayornan informacion. Por ehemplo pa loke ta e Social Crisis Plan, mayornan ta wordo informa. El a bisa cu e ta un persona cu sa carga pasenshi, pasobra no tur cos ta logra den un dia, y no mester give up. Scol tin cu keda duna y pa SKOA esaki ta hopi importante. Diferente director di scolnan di SKOA tambe tin esaki na pecho y ta inverti den dje, no obstante cu no tur mayor ta bin na anochi nan informativo, pero nan ta sigui duna esaki pasobra e tiki cu bin por yuda cu despues bin mas pasobra nan tambe kier sa tocante e desaroyo di nan yiu.